

MAURISE FAURE

RECUEI DE POUËSÌO PROUVENÇALO

Cette édition, entièrement préparée par l'auteur, a été réalisée par les soins du Comité qui a fait ériger le buste de Maurice Faure dans le jardinet félibréen de Sceaux le 29 Juin 1924; pour les souscripteurs au monument et les amis du Majoral du Félibrige, Ministre de l'Instruction Publique.

Tirage à 600 exemplaires numérotés dont 50 sur vergé d'Arches.

Exemplaire n° 7.

PREFÂCI (1)

Maurise Faure, un di cepoun egrègi de nosto Causo prouvençalo, nous douno enfin l'acamp d'aquéli pouèsio fino, qu'a jita, se pòu dire, à la rapiho un pau pertout, coume aquéli dragèio de tóuti li coulour que jiton li peirin, lou jour d'un batejat.

Maurise Faure es un di rare que representon vuei la Reneissènço felibrenco despièi soun espelido, au tèms di Primadié, enjusqu'à nosto epoco d'espandido superbo dintre tout lou Miejour, e éu la represento, coume militant fidèu, desempièi mai de quaranto an, aguènt pres part e bello part, coume ardènt maintenèire e flame majourau (1886) i manifestacioun li mai brihanto e impourtanto de nosto respelido.

Nascu en Dóufinat, à Saliens, dins la Droumo (1850), abari en Alès, — qu'èro la vilo de sa maire, — atira au Felibrige pèr la trevanço d'Arnaviello, de Gausseu, de Roumieux, e di felibre d'Avignoun, qu'èu li couneiguè de bono ouro, pièi mountant à Paris — ounte fuguè foundaire de la *Cigalo* parisenco e de la *Soucieta di felibre de Paris*, — à travès de sa vido literàri o poulitico, noun reneguè jamai l'afougamen de sa jouinesso. Emé sis eleitour e monte que fuguèsse, noun i'a jamai fa peno de parla prouvençau, e, ço que i'es particulié, es que, dóufinen de neissènço, abari en Lengadò, pièi abitant Paris, s'est fa un plesi de-longo, quand l'ócasioun lou permetié, de parla prouvençau, tau que se parlo long dóu Rose.

Soun enfluènci à la Chambro, l'emplegué, coume se saup, largamen, autamen, pèr faire releva lou Tiatre antique d'Aurenjo; e quand èro ministre de l'Estrucioun Publico e di Bèus-Art, faguè pèr lou regiounalisme, en ço que retrais à l'istòri, tout ço que fuguè possible.

Sus tout acò, dóu rèsto, cresèn que lou plus simple es de leissa parla l'ami Maurice Faure.

Veici dounc, à prepaus de soun recuei de vers, ço que nous escrivié:

- Mèstre ama e grand ami, l'idèio m'es vengudo, aro que vese trecoula la souleiado de la vido, de faire uno garbeto de mis obro prouvençalo, escampihado de tout caire.

Saran ligado, mi pouèsio, em'un riban ounte i'aura aquest titoulet d'escrì: *Nèblo e Soulèu*.

Li *Neblouso* saran aquéli ounte, souto lou cèu gris de la Capitalo, ai di ma languitudo e ma malancounié de jouvènt despatria liuen dóu país nadalen.

Li *Souleiouso* saran aquéli ounte ai canta noste bèu Miejour felibren e cigalié, enaurant la glòri dóu terraire e lausant la resplendour dóu reviéure mistralen.

Pàuri floureto, ai! las, anequelido que lèu-lèu se passirien, s'uno eigagnolo maianenco ié venié pas douna la voio e lou parfum!

Dins lou pres-fa di felibre, quer fuguè la passioun de ma jouvènço, coume es encaro majoio e moun soulas, lou pouèto n'es esta pèr iéu que l'ajudaire de l'ome d'acioun. Siéu esta subre-tout un afeciouna de la Causo, aguènt sèmpre pèr toco d'espandi à Paris, e de Paris dins tout lou mounde literàri, lou renom dóu Felibrige.

Escrivan, deputa, senatour e menistre, es la glourificacioun de la prouvinço qu'ai agu'n visto e, mai que tout, de la prouvinço di prouvinço, nosto bello Prouvènço, sorre de moun Dóufinat.

Acò 's bèn di — e me rapello uno amistouso proufecìo. Un jour que felibrejavian à Dounzero, en 1885, encò dóu pintre Fèlis Clemènt, aquest, enjoulia dóu bèu gàubi de Maurise Faure e de soun paraulis, s'escridè:

- Coume parlo bèu! veirés qu'un jour sara menistre.

E menistre fuguè, lou felibre de Saliens. Urouso nosto Causo, s'éu l'èro resta'n pau mai!

FREDERI MISTRAL.